

ONDJOKONONA YA MEME SERAFIA NAKAVILU AUSIKU WA-AINDAKA

Onzililo koshoto

Meekulu Serafia Nakavilu Ausiku waAindaka

Okwa li ku na omusamane Malovu yaAndjele ta vala Naukulya, Naukulya ta vala Ausiku yaAindaka (Mapele) okwa valwa pamwe naShekupe, Kamwaha, omukwanambwiyu. Yina yootatekulu Munamba waNanyala, Oovainaha nayakwawo. Oya valwa natango naMphingana yina yaNdunge yaKaundjwa (meumbo mu mu na tate Sibirianus Ambunda). Ounona waAusiku waAindaka osheeli, oSerafia Nakavilu Ausiku, Hinaiyali Gosbertus (hina eemwenyo mbali nande onda sa) na Pia Kafiona Ausiku, ngu a fiwa mezimo he nghyi a mana eendjenda.

Ausiku Omukwamandjila kepata, sho osho nee nakusa Omukwamandjila koshoto.

Kepata

Okwa li ku na omukulupe Namupala waAukunde, omumwayina naShilunga shaAukunda naEelu lyaAukunde: Onghoya yaShilunga Shaukunde, aakwanghwiyo kepata.

- 1). Ndiyakupi yaAmaulu ngu a vala Naitumwa Aimbili, (ngu a vala Kafenya) na Nauwanga yaImbili
- 2). Shihambo shaAmaulu
- 3) Koiyuwo yina yaAndowa Kautondokwa naNakwenye Kasita yi na yaAakwanamakalu.
- 4).Nauvu waAmaulu (Yina yaKapia kaAloovi naNaule yaAmbuvi, yina yaShikonda naKondjeni Paulus Aluvilu

Oku na natango Eelu lyaUkunde yi na yOokaikweya Kakuwena Angula Omumwayina waShilunga ino Namupala waAukunde okwa vala Ikuna yaShimweneni (Kapita Kanailonga) yi na yaAiyambo yaKatale ngu a vala AakwaAusiku naakwaAndjene. Aiyambo yaKatale okwa valwa na Ndemoongela (Kashapi) Anghuwo naAmavila Edemude Muhama. Ikuna okwa valwa pamwe naNashikunyenge yaShimweneni yina yaMwiyale, KASHUUPULWA KEITA NOSHO YO AIPINGE yaShimweneni he yooKamundole kaAipinga.

Evalo

Osha li momasiku 4 yaSeptemba 1928 nghyi meumbo lyaAusiku waAindaka naMweshikolela Aungenda, Aiyambo yaKatale wa holokele ehafo enene nghyi mwa valwa omutwi woikwiila ye ta pewa evina naKavilu. Nakavilu okwa valelwa nee mOnaitembu mOmbaanhu molyahe Ausiku yaAindaka, he okwa li a nangala mokaumbo kaShambongele pOshitata.

Eputuko

Okwa putukila paakulunhu yaye nokonima he nghyi a hulifa oya shuna koohekulu Kashuupulwa kEita pOkayekongwe. Yinakulu Ikuna nghyi a hulifa pOkayekongwe oya tembukile naAiyambo kOmufituweelo inghu ya monenwa eumbo kuKalya, Ekandjo IyaKataula.

Mba ya putuka nao pOkaekongwe:

1. Nehoya IyaAndowa (Benesia)
2. Eelu Andowa (Aurelia)
3. Namavila yaKamulunga Popyeni Kamulunga (Patricia) yi na o Ndjimbi
4. Albina Shivinifa
5. Magdalena Shekupe Shaifete

Oiholikenima

Ouvano wopamufiululwakalo

Serafia oya li aakavona imba haa yi kouvano, imbu wa li vingi momukunda Onaitembu, ouvano mbuno owa li hau vanenawa pehenene Iya simana , “Ehenene IyaNyamunghandi “ olya lukilwa okavia ke li polyAndowa ano monena poshuumbo shaSergius Heinrich. Ehenene ndi olya kala Iya simana unene omolwenyakwa/onghulungu youvano meme nakusa Mbute, Hortensia Kalumbu, ingu a li he wi imbi noku uvana nounyakwa ndele nahe yaukuku tatekulu Kalumbu ta zi meumbo e ke mu pwaikine.

Kakele kouvano meekulu Serafia okwa li

- e hole okutwa nganhyi a li ha ka twa naakavona aakwawo polyaNakakanda (pOlefa nganhyi)
- haa yi kokuti taa piti ongula taa ka kela ko oikaani, tayi kaha taye ke yi tala ko.
- e hole okutunga, ombale hau ongelwa meumbo limwe sio ovula tayi loko, opo nee tau ka etwa mo ndee tau pwakulwa, tau kohwa, (esiku Iyepwakulo – kehe umwe taa ulike ombale waye mbu a tunga.
- e hole okuhonga eembiya, eembiya vo oya li haa yi navo kOngandjera taa ye vi shingifa taa pingakanifa neemhalo vomongwa. Oya li natango ha aka shingifa kOmbandja taa ka konga Omanghete nayi kwawo yimwe.

Osikola

Oya li haa yi kosikola yokulesha haa longelwa pomaviya yaKondjo moNaitembu taa longwa okatiki kuSesita Mansuweta te ya longo ye li pamwe natate Ambrosius Andjamba haye ya nokatamba.

Oya li haa longwa ike okatiki, oipango yaKalunga.

Osikola ya ka tembukila keemwandi vaNamai inghu kwa li haku yi oonakusa Edemunde (Edmund) mba ya fa ye uvite ko shaashi okwa li mosikola yongula.

Okuza nee mpho Meekulu Serafia ya ka ya kosikola koAnamulenge, haa longwa etine noSoondaha, elalakano oku ka longwa ike ya mone eshasho. Yamwe yomaalongi yaye oyo Tatekulu Adam naJurius Nguluwe.

Olufuko

Monale aakavona shaa ya koka oya li haa falwa kOlufuko, Nameekulu Serafia okwa fukala kOlufuko halu ningilwa kolyaKavivi. Omufukiki wayo okwa li Meekulu Aunghono. Okwa fukala nee pamwe Okwa fukala noomeme mba taa landula:

- Shongola shaAkwahimako
- Nanghuwo yaKambuta
- Ndeshitiwa (Otilie yaMalulu)
- Loide yaSimeoni (Omholo)

Oukriste

Meekulu nakusa okwa shashwa momasiku 20.04.1946 (Kupata Osuwa) Oswald, ye ta tambula omasakaramende nganhyi taa landula:

Omaihokololo yotango mo 27 Apilili 1946

Etuumbo omomasiku: 21 Apilili 1946

Ekoleko mo 13 Septemba 1948 (Kupata Gothard)

Nakusa okwa li omukriste a kola meitaelo, oshilyo oshiviinini shongundu ya Legio Maria

Ondjokana

Meekulu Serafia nghyi a koko okwa mono po omuyalekwa waye Sevelinus Kakangwa. A ningile ohango ye koOmuyale yaKashuupulwa a ya kOokakangwa a ka za ko nee nghyi omusamane waye a hulifa.

Nomomasiku 24 yaNovomba 1948 oya viki ondjokana yawo naSerafinus kaKangwa, mongeleka yaAnamulenge ya hokanifwa kuPata Oswald a li a shiika nevina Pata Nambaka.

Mondjokana yawo tate Kalunga okwe ya pa mo omaano yokaana kokamati Ambrosius Sevelinus omukwaita woSWAPO e shiike nawa, ngu a tetekela nale moukwaaluhe.

Inaa kala unene efimbo eleke tate Sevelinus okwa ka mana eendjenda. Nghyi a fiwa po omusamane nghyi a hulifa okwa shuna kolyaina pamwe nokaana kawo kOmufituweelo.

Konima okwa ka hokanwa po a oli kuTate Justus Kashindi noya hokana momasiku 16 yaJanuali 1952 okwa ka hokanunwa kuTatekulu nakusa Justus Kashindi koAnamulenge.

Oya kala meumbo mooyinamwenyo, moomeekulu Nakavilu Kautati, Selma (Shomboli) pamwe naatekulu yawo, Ndaambanovi, Ndeumona naShangheta. Oya kala mo nombili neuvano naatekulu yawo mba. Mondjokana oya pewa mo omaano younona une aamati yaali naakavona yaali.

Nghyi a kala moSisia omusamane waye okwa li omulongisikola ashike Meekulu Nakusa naye okwa li ha longo osikola mokaye peumbo lyawo unene tuu ounona wopoushiinda, ongundu yaye oya kala meumbo sigo onena ndji, noyendji yomaalongwa yaye oya ya kOshivi, nganhyi ohaku ti Okanimekwa. Oya kala natango haa yi komamisa koAnamulenge taa ende keemphavi.

Ookaume

Okwa li e na ookaume oyendji, oya li panga ookaume noomeme yatatu ndee ta ilukile omavina yeemwevi.

Meme Serafia Nakavilu – Januari

Meme Bergita Mupopya – Febuali

Meme Konstansia Aifete - Maalisa

Natango okwa li e na ookaume oyendji yaakulukavi taa ka ka eembivi vawo yo taa kolo eengongo vawo, opo ya kale nomiyelelo va wana.

Opolotika

Okwa kala omukondjelimanguluko mba ya kala haa lilwe meni lyoshilongo taa kwafa Aakwaita yoSWAPO, he ya telekele oikulya. Nghyi ya kala noutekulu waye oyo nee ha pe oikulya wu faalele aakwaita ye li mekoye. Nge opwa enda aanhu yokoshilongo ile aanasikola mba haa zi kOngwediva a ku ti ounona inawu popya kutya owa mona aakwaita. Oya kala haa vana oinheya a ku ti oimbale itula pondjila a kuti oyomukulupe, yo aakwaita taye yi kufa po taa ka Iya. Oyana yatatu nayo oya li yay a koita wewawa lyoSWAPO, umwe womuyo okwa saala mekondjelomanguluko ongoshilyo shoPLAN. Onghee konima yemanguluko epangelo olye ke mu pa nghaa omakwafo ayehe nga haa pewa oonakulwa aakulu.

Oukwatya

Oukwatya wa Meekulu Serafia Ausiku. Oye omunambili, omwiivivimiki, omutalanheni. Omusimaneki wezimo lyokoohe. Aluhe oha ti ye Omukwamandjila, Omukapandja ta ti. Ye ta weva po ta ti ye Omukapuku keEndjambi IyaAmushila a za kOngandjera. Meekulu okwa kala Omuviinini weitaelo sio ta mana eendjenda. Kakele kaambyo ya popiwa metetekelo meekulu nakusa okwa li e hole ezimo.

Meekulu nakusa okwa li e hole okutalela po aakwanezimo unene ngaanhyi kOmufitu wEelo kooyina, kOokalya/Ekandjo, kOokatekete kooMeerita, (Mennas Andowa) kumumwayina, Pia Kafiona kaAusiku. KO kayekongwe koohekulu Kashuupulwa Muyale poshiumbo kOohinayiyali Ausiku, ngu a li ehole kupopya ta ti Goosi yaTate. Ta talele po natango a li kOokaikweya, Munyaputu pOnhimbu. Nge ta yi taka talela po koshilongo, oha talele po kOnaitembu kOohekulu Kautondokwa (Andowa) nomaumbo a li omendji yoohekulu ngaanhyi Kalola kaShitaleni, Nanyala molyahekulu Aindaka nale nomaumbo omendji yoohekulu nayo kwe ya simaneka. Etalelopo limwe oha yi kOmbandjele kolyaKahambo kuyina Naule wAambuvi. Iha kala a li ina talela po kOmahokwe koohekulu Edemunde Amavila nokumumwayina Onesmus Shipopyeni Namakalu. Oha yi ko unene nelelakano lyoku ka kwafela okuhwa nokuyela.

Nghyi ya kala ayehe momukunda Osisia oya kala nekwatafano oliwa namumwayina Albertina Nakambwela Aipweya. Meekulu nghyi ha talele po nge owe mu talela po okwa li ha yanda eesipenifa hano okwa li omuyandji.

Ounghundi

Meekulu monghalamwenyo ya ye ka li naanaa woshipangelo ashike ounghundi owe ke mu hanga nghyi e li meevula voukulunhu. Okuza meemvula 2017 ounghundi owa enda nghaa tau viinine ye ta kala ta ya kulwa mOshipangelo shaUtapi. Oyana oya kala ha ye mu yakula meumbo pamwe naashiinda nomutekulu waye Ndemweetela, Kandemu. Sio nee oshikando shahwiinina mOsoondaha momasiku 20 Juni 2021 a kala ke uvite nawa ye ta etwa koshipangelo ashike okwa hulifila ashike pomafikilo mpha hapu yakulilwa aavu.

Meekulu oya valelwe ye li ya 5 okwa fiya ko aamwayina aakulukavi yatatu, omulumentu okwe ya tetekela nale moukwaaluhe. Okwa fi yak o natango oyana yatatu omulumenhu umwe naakiinhu yaali. Osheeli shaye nashilandula shasheeli oye mu tetekela nale.

Pehulilo a tu pandula tate kalunga nghyi a kala pamwe naye sio ta hanga epipe lyeevula 92. Omwenyo waye nawu vululukwe nombili. Amen.